

Brief des Prince van Orange aan de
Walcherſche Staten, over het aan-
ſtaan van opgebragte koopwaren te
Vliſſingen, tot gaandehouden van
den Oorlog.

10 Juni 1576.

Die Prince van Oraengien, Graue van
Nasſau etc. Heere ende Baron van
Breda, van Dietz etc.

Eerſame Wyſe lieue beſondere. Alſoo wy tegenwoor-
delick by den Treforier Manmaecker hebben verſtaen, dat
op de propoſitie ghysteren ghedaen zynde in de Vergade-
ringhe van den Staten deſer landen, by den Steden zoude
verclaert zyn, dat zy voortaan egheene middelen meer en
wiſten om die wekelycke leeninghe van de Soldaten nu

ter

ter tyt hier inne zynde, mitsgaders van den Schepen van Orloghe voorder te continueren; het en waer dat wy hen wilden confereren daer toe te ghebruycken alsulcke goederen als binnen der Stede van Vlissinghen legghen ende toebehooren zekere Inghelsche Coopluysden ghenaeft die Bertholders, zynde deselve goederen Litigieux tusschen den Coopluysden voorsz. ende den Cappiteynen die dezelve inne gebrocht hebben. Waer op wy V. lieden dese wel hebben willen schryuen ende segghen, dat alsoo tot conservatie van den lande, ende oock tot voorderinghe der zaacken van Ziericzee gheheel noodich is, dat de benoemende leeninghen gecontinueert ende oock die Schepen van Orloghe onderhoude worden, sonder dat eenich ghebreck daer aen en zy. Ghy lieden dien volghens nyet laten en wilt, elck in den synen, alle mogentlycke middelen voor te wenden, ten eynde 't selue mach gheeffectueert worden. Ende oft die Steden van de penninghen daer toe dienende onvoorsien waeren, ende egheen ander middel en wisten als de voorsz. litigieuse goederen te aenvaerden, dat indien ghevalle de voorsz. Steden by alle gevuechelycxste ende bequaemste middelen foecken te handelen, soo metten Coopluysden als oock met de Cappiteynen actie daer toe pretenderende, van de selue wederom goet te doen sijn ghenen die daer aen gherecht sal worden bevonden, soo wanneer 't proces dies aengaende gevundeert sal zyn, op dat alsoo een yeder van de partyen contentement mach hebben.

Ende alsoo die voorsz. goederen in der haest nyet wel souden comen ten hoochsten vercocht worden, ende dat nochtans dynsendaeghe naestcommende die Leeninghe nootelyck moet geschieden, ende oock die Schepen moeten onderhouden worden, soo waert goet dat ghy lieden middelertyt eenighe penninghen op de selue goederen

foeckt

soeckt op te brenghen, midts daer van op de vercoopinghe van diet rembouriement doende, ten eynde alsoo aen de voorz. Leeninghe egheen ghebreck en zy. Ende hier mede verhopende dat ghy lieden volghen V goede genegentheyt tot welvaeren van de gemeene saecke alle goede offitien hier inne doen zult, bidden wy God Almachtich.

Eersaeme Wyse lieue besunderere met V lieden te zyne, Gheschreuen binnen der Stede van der Vere op ten xxiij dach van Junio anno 1576:

V lieder goeder Vriendt. geteekend Guille. de Nassau. lager geteekend N. Bruynick.

Het opschrift

Eersamen Wyse Onsen Lieuen besunderere Gedeputeerden van de Steden van Walcheren representerende den Staten van den seluen Lande.